

254
2324
4

代州道後馮氏傳誌目下

崔夫人傳

節壽王太夫人傳

王太夫人合葬墓誌銘

節孝夫人錄

傅夫人傳

楊夫人墓誌銘

魏夫人墓誌銘

田夫人行述

蔣恭人行述

張恭人行畧

王淑人墓誌銘

張孺人墓誌銘

王夫人行述

戈恭人墓誌銘

李孺人家傳

李孺人墓誌銘

馮氏誌傳目下



王宜人行述

黃孺人墓誌銘

周淑人家傳 未刻

范安人墓碣銘

王孺人墓誌



皇清誥贈夫人馮母崔氏傳

樵李周拱辰撰

方伯公之前母崔以子貴故封夫人閭里榮之

公熙宇先生于地下孝也謂拱辰稍習于文者公

拱辰既悉梗概太息久之曰均前母也而有幸

人何以得此乎豈非天哉然而非啻以其天者難也以其

賢而不愧乎天之答者難也蓋夫人生前之難者二死後

之難者三曷言乎生前之難者二也難乎其事故也難乎

其總家政也曷言乎死後之難者三也難乎夫子之成孝

廉也難乎後之賢而我與並美也難乎誥嗣之爲

崔夫人傳

卷二

國楨而獲邀彤命也事姑柰何姑耄矣又善病滌瀉脂滑溫
清漱澣未已也察病癢謹湯藥而敬抑搔之匪雞則鳴中
夜數四起伺姑之聲息以爲喜憂否則不敢以安寢故曰
難乎其事姑也家政柰何馮故素封贈公性爽岸不屑屑問
家人生產然而大父逝矣誰爲紀綱之僕者夫人曰吾柰
何愛十指任家事之耗落以爲先君子憂綜理精密以勤
先諸僮獲而生業日益進故曰難乎其總家政也此生前
之難者二也成孝廉柰何成者功乎成之者也不以兒女
柔累夫子豪不以雜佩贈狹夫子交不求田疇舍米鹽

子母妨夫子讀沒未幾而賀登雋者隨至故曰難乎夫子
之成孝廉也並美柰何王太夫人賢矣志節凌霜菲雲霄
一羽哉少遜焉前美以後美掩矣夫人殤而德故勸也蘭
與蕙並馨何間焉故曰難乎後之賢而我與媿美也詰嗣
柰何翟莠璵珩全贈公拜

恩綸于地下卽子也才而勿必通顯卽通顯而勿必爲

天子重臣卽爲重臣而勿必榮綸以爲泉壤光可何如哉故曰
難乎詰嗣之爲

國楨而獲邀彤命也此死後之難者二也夫人兼而有之天

與其人與足以慶矣足以傳矣

節壽馮母王太夫人傳

構李周拱辰撰

忠孝節烈爲立地立天鼇柱世不皆卿雲人不皆蔗境燕
羽差池而髡儀整志夫豈必硜硜溝瀆哉立孤與死孤孰
難前乎此者有人矣後乎此者有人矣何人爾則今方伯
公之太夫人馮母也母爲進士王乾亨先生女贈公熙宇
先生前配早世委禽焉母生而靜淑寡言笑喜讀孝經列
女諸書已復繇繹經義古史每至忠孝節烈肅然起敬如
見其人不啻作紙上觀而已善三唐咏成則火之曰婦言
不踰閭乃學班姬左芬輩以文辭落人口哉于歸聿修婦

禮事夫饁敬有卻婦風時贈公爲諸生閉戶攻苦太夫人
黽勉居多常條臚徃蹟諮討大義門中自爲師友如兄如
弟哉琴瑟也而壘篋矣贈公舉於鄉效文伯母績不休或
爲勸止笑謝曰馮世硯田而嗇幸稔矣而遽忘十指勞乎
勤如初祖姑劉以上壽須藥裹姑劉侍湯藥湔中裙八閱
月憊甚太夫人襜裙不解寢食不甘宵掖姑無替晷形瘦
骨墳與姑同憊姑撫膺嘆曰新婦良苦吾之瘁而病也以
吾姑若之瘁而病也以姑之姑孝一至此乎比姑卒不
復贈公哀泣擗踊雞骨支床幾至滅性斂衾櫛皆太夫

人躬親之襄厥事無少憾久之贈公竟卒以哀毀是時方伯公纔九齡弱女在抱臨訣以藐孤相託太夫人一慟幾絕祝以身代不得燃指截髮速矢同穴曰天乎天乎使我窮至此吾生也乎哉衆以弱息慰勉已而曰然吾不獲死也疇瘞先骨鬣封而崇疇淑吾子不鰥而龍吾忍吾餘生以待矣抑痛茹哀勉起治生拮据家政一如贈公時而庭訓一事尤加殷重紡燈佐讀與雞聲相遞代曰若亦繩而父而宗是鳩乎夫先德之勿荷是焚穀也忠孝耕仁義耨而中棄之是子不終畝也盍亦勉之矣方伯公服膺慈規

卒成偉器爲

天子股肱豈非太夫人以四十年匪石冰操玉之成哉太夫人賦性夷澹而敏才偉識十倍男子初咏晏爾卽經營菽水佐夫子讀字畜特蒔桑竹蔬果以谷量蔬逮遠戚賤至臧息無靳繒莒焉而拊荼苦悴服疏飲澹則未亡人終身一日也仁粟祀乎夫且代贈公而子燕翼詒乎夫且代贈公而父主伯亞旅莊而食惠乎夫且代贈公而家督而嚴君方伯公扳太夫人輿北蒞燕南蒞越一奉懿誨以周旋而含飴之弄義方之訓且及孫之孫夫固以灑水湟中激江

在處爲鯉庭矣。馳使旌廬鳳綸題節天之報。施閭懿寧有
旣乎。昔人稱狄懷英爲斗南一人。吾以太夫人爲斗南一
女。珥三管者。當以余爲知言。

皇清誥贈通奉大夫鄉賢馮熙宇先生暨

誥封太夫人節孝馮母王氏合葬墓志銘

內國史院學士年眷晚生田逢吉頓首拜撰文

內宏文院檢討年眷晚生田喜霽頓首拜書丹

內秘書院中書舍人年家眷晚學生萬光選頓首拜篆蓋

余聞今晉之有代馮氏猶太原之王博陵之崔不特以科
第顯人世不絕蓋以名節道義爲晉望族云余與同年訥
生馮子游京華訥生於丙午春爲位以哭其祖母余過弔
唁之因得讀方伯公所爲王太夫人狀太夫人蓋苦節數

十年功於馮氏甚偉明年丁未夏訥生過余旅舍言與淚
發手方伯公爲其先大夫鄉賢公先王太夫人狀屬余志
銘之將以九月合葬祖阡也余伏讀終篇其事質詞哀爲
之愴然流涕嗚呼方伯公孝子哉余不文以通家誼不敢
辭謹按狀馮氏世齊青州人明成化中以軍功授衛職徙
守邊來雁門諱盛是爲代馮氏之始祖生二子長時時二
子長天祿號壽山以子貴 封文林郎昌黎知縣壽山公
配劉 封孺人壽山公力田讀書隱居嶄然繩尺有古節
士風四子以文武著聲時萬歷中海內無事士君子篤交

遊率千里問道於壽山公其四子彬彬應對方之公沙五
龍云次子恩明癸酉得雋鄉薦出爲循吏尤著昌黎壽山
公蓋以次子封也四子愈號章泉卽鄉賢公之父也好學
善文以毛詩講學勾山泚水間終明經弗仕以孫仕方伯
江南

皇清贈通奉大夫江南右布政章泉公配劉

贈夫人生三子長卽

贈大夫鄉賢熙宇先生諱明期字闇若號熙宇以學行著萬歷

中學者嚴師之率稱熙宇先生云先生先王太夫人五十

王太夫人合葬墓志銘

卷

五年卒時張大司馬先生爲之表張方岳先生爲之志且
久亦詳哉其言之矣然余悲其以盛年齋志爵不酬德位
不符材不克充其大用以終也傷哉考先生平生大節有
四其事劉母居則色養志養溫清劬劬弗敢違病則晝夜
湯藥躬浣厠踰額天號呼祝以身代沒則躡踊泣血三年
寢不去苦食不御驩卒以勞毀疾疾且不起是死孝也撫
二幼弟以有成詩書之家室之怡怡無幾微間受先人之
遺以瘠自予以豐贍兩弟其盡友也十三年孝廉不以片
牘干公府不能廣田廬寸尺潔身也如此友人某某窮且

死爲營葬賻衣食其子若孫其篤分義如此至先生之學
始則爲詩詞雕績之文繼則好釋老清虛之旨終則浩然
有悟於大易中庸信道堅勇不惑語必程朱願必孔子孟闡
微言而紹絕學屹然爲世鉅儒使先生大年高位必當砥
頽流淑世教有功於古聖賢豈小哉嗟乎顏子之年冉子
之疾自古嘆之矣太史公曰儻所謂天道是耶非耶然先
生沒而節婦光其緒肖子亢其宗天道之報施善人亦不
爽矣先生元配

贈夫人崔氏大鴻臚崔夢徵女有婦德恭慈能宜其家志銘已

久不敢復贅先先生十五年卒繼配爲節孝太夫人王氏
明庚辰進士戶部清吏司主事王公乾亨次女幼靜重寡
言笑王先生博雅大儒授太夫人以孝經列女諸書太夫
人稍習輒淹達王先生歎曰惜若女也可盡讀吾書矣太
夫人從旁曰女子縱弗制科綱常節義異乎哉王先生心
異之及笄歸熙字先生侃侃自將雖少年米鹽內政力肩
承之不以撓夫子誦讀心時祖姑劉以上壽須扶掖湯藥
姑劉孝謹奉養八閱月憊甚不起熙字先生太夫人不
交睫不釋衣左右之比祖姑劉卽世姑劉亦卒嘗病

中憫其積勞輒遣之曰若少休矣若二人勞如是恐先我
不支新婦亦孝至此乎先生竟以是致疾哭踊泣血殆至
滅性歛衾襲太夫人皆躬襄之奢儉中禮士君子哀其
誠躋其法焉先生以過哭泣病渴甚走伴訪良藥善醫於
丹陽數年不瘳時太夫人年纔二十有七遺孤二方伯公
九齡女七齡也先生易箒時惟諄諄以勉訓藐孤無墜先
業爲言太夫人截髮戮指誓以身殉三黨諸媼咸敦勉曰
嗟乎孝廉公無日矣顧若爲馮氏也婦者爲馮氏也子爲
孺子也母者爲孺子也父感慨自殺其畫無俚之至耳馮

氏覆於斯續於斯死烏乎可死烏乎可太夫人流涕謝曰
天乎未亡人卒不得從地下耶死則家毀守節則孤存敢
不忍死以祇諸夫人命大事已出先人遺書授方伯公曰
而忘而父之早年乎家學之弗傳如先孝廉何家聲之弗
振如未亡人何方伯公仕南北以文章功業稱

國初名臣太夫人之訓爲多哉戊子方伯公以西寧道備兵
湟中猗寇數萬擊城方伯守數十日庫藏空竭太夫人出
簪珥衣服謂方伯公曰若以此酬戰士與共勞苦勿少怠
朝廷畀汝以土地城存俱存城亡俱亡以家殉以身殉義也卒

之寇却城完其毅然嚴恭篤忠孝大誼類如此至長孫曾
孫皆以襁抱失母太夫人撫之恩勤尤至長孫卽今國博
君以詩古文爲名士每爲余言自四五歲時太夫人卽口
授以經書句讀國博君來太學太夫人諭之曰澹泊明志
行矣勉之惟義命是安敬厥身以無負吾三十年鞠育哉
蓋太夫人明大義慈而不縱故每言輒合於古先正嘗謂
子孫讀書貴能行說鈴書肆雖萬卷何益前是國博君成
青衿拜階下太夫人色喜且曰昔余以孑然一嫠九齡之
孤四面之侮將謂家墜身殄得數椽數畝馮氏延厥宗幸

矣不謂爾父能成立况及見爾之爲子衿也未亡人可告
無罪於地下矣泣然泣數行下至太夫人教次孫曾孫亦
及見其成青衿娶家室云太夫人尤好施賑六親寡者待
舉火數十家善三唐咏成則火之不以示人嘗手鈔古詩
十餘冊日誦梵經數十卷治家勤儉自力大年不衰素強
飯不杖以病痢數月卒於家考太夫人始末其事始盡禮
有桓少君之風教子服官如房景伯之母獨其以盛年執
義在馮氏有再造功懍懍焉皜皜焉推其志良可與日月
爭光也晉士大夫稱說太夫人節孝者以享耄壽膺

封誥爲天介之福以酬厥操然察其艱貞傾否危而後安豈非
爲其極難者哉熙宇先生生萬歷三年乙亥二月十七日
卒萬歷四十年壬子正月初九日年三十有八萬歷庚子
鄉試中式第二名崇祀鄉賢有錄數卷行世

皇清覃恩贈通奉大夫江南右布政使著詩古文百餘篇行世
易解詩說數十卷兵火散失逸不盡傳崔夫人生萬歷四
年丙子十一月二十五日卒萬歷二十六年戊戌五月初
三日年二十有二

皇清覃恩贈夫人王太夫人生萬歷十四年丙戌八月十六日

卒康熙五年丙午正月十一日年八十有一崇正中以節

孝建坊旌表

皇清覃恩封太夫人崔生女一適明陝西總督孫傳庭王生男

一如京恩貢保舉賢良方正

皇清順治中歷升廣東左布政使終養致仕娶傅氏明禮部尙

書謚文恪新德公次女

贈夫人繼娶楊氏明兵科都給事中楊公恂孫女

封夫人女一適明進士雲南叅議楊鼎樞仲子仲芳又側室繆

氏生女一適揚州庠生張延齡孫男二雲驥乙未進士國

子監博士娶施氏繼娶黃氏雲驪廩生娶魏氏孫女一適
庠生張尹曾孫璧增廣生娶張氏曾孫女一雲驪出幼曾
孫玉虎雲驪出以丁未九月方伯公以太夫人祔葬於熙
宇先生兆距代城二十五里花家莊之原嗚呼先生聞道
早年太夫人敦節沒齒孝義萃於一家箕裘傳於後祀先
死者不死後死者不愧矣敬爲之銘曰勾注嵯峨滹沱繞
中有鉅儒服聖道不于其身于子孫天留餘慶唯善報躋
哉夫人成節孝母且父師義方教孤心耿耿日月照馮氏
之緒實再造吁嗟哉佳城松柏鬱蔥蔥夫人後公五十年

於此再相逢仁至義盡無愧容
皇天后土鑒孤誠名山大
川護幽貞銘之萬古正人倫

節孝夫人錄

紀孝

男如京謹次

蓋聞之三黨諸媪云老母事姑純孝爲新婦三月卽值曾祖妣
劉母病祖妣劉母侍湯藥衣不解八閱月家大人老母同扶掖
奉養形神俱瘁曾祖妣病革祖妣亦因勞致疾漸至危篤家大
人老母晝夜侍藥餌顙天願以身代祖母卒不起以萬歷三十
一年正月九日寢終先君哀毀過勞憊不能支每一號涕鼻血
如劍一切喪事皆老母經理晝夜目不交睫者二十日哀悼誠
惻盡孝盡禮至今人能言之

紀節

先君以萬歷四十年正月九日捐館時母年二十有七先君以居喪過毀致疾母誠事之一如大母病革之日諄諄以孤兒暨幼女相託母拊膺嗷天泣血截髮矢斧屋相從三黨諸媪以存孤大義力挽之然粒米弗進者數日繼以下兆建阡痛深悼重遂感肺腑之疾迄今藥餌不敢離蓋自先君見背時如京九齡至今歲癸卯如京六十有一老母孀節五十二年矣如京方孱然弗能立乃族中有以隙可乘搆難者且至於訟老母謂誼關骨肉勿爲過激以至誠感之俟其悔久之其事亦寢

嗟乎當斯時也老母一婦閨人禦家難撫遺孤風波震撼而不
驚異說講張而不懼卒綿馮氏之宗開曾元之祚非大德大智
孰能與於此

紀訓

如京十歲老母授以論語周易講說大義常訓曰弟子入則孝
一節正爾幼學立身規模無友不如已比之匪人不亦傷乎正
爾今日擇交取友立身根基每勉以亢宗承先輒泣下

辛巳迎養灤州署老母諄諄訓以清白字民常謂如京旣爲民
父母須體貼父母二字寧過於慈催科務緩卽以催徵不如額

罷去亦不失爲循良吏若嚴敲朴以爲風力是以人命博功名也雖升遷吾不願見時灤治廳距內宅不遠每責人數稍多老母卽終日不憚時攢槽一事老母喜甚

順治丙戌迎養靖邊道署時大寇黃色俊起城守兵乏餉老母毀簪珥率子婦出衣質錢以餉兵士卒聞之皆爲感奮老母謂如京乘賊散掠人心稍振宜速勦之如京督兵半夜馳九十里至園林驛以兵三百破賊數千誅黃色俊事詳別錄

戊子迎養西寧道署值徇變圍城七十日時人心震恐老母謂如京爾但以忠義勵將士食人忠人義也其獲全與否則有天

在如京每與諸將吏言及衆輒奮曰太夫人一閨中人尙知此義吾輩寧不知子臣之義哉相率爲死守計秦督兵至寇平圍解是年秋老母攜孫雲驤及孫婦歸代州

癸巳迎養金華道署老母手寫孝經及金剛經各六冊令如京檄禁屠牛

甲午迎養江南藩署老母於途中買放魚鰕數千萬

丁酉秋如京赴廣東左藩以道遠炎熱不能奉母同行老母歸代州如京送至維揚老母切以粵瘴癘爲憂謂如京敬慎晚節以謙和清白爲誠如京謹跪受教

庚子如京請告歸里養母今年癸卯老母七十有八健飯耳目
聰明從來老母與六親晚輩語必以孝教爲子以弟教爲弟以
慈儉教治家子姪在仕途者教以寧貧勿富寧拙勿巧寧難進
勿速化晚輩有過則面責之故親戚聞其訓多改過遷善者

紀訓

孫雲驥謹次

雲驥四齡背母祖母鞠之口授經書及長就傅每歸令誦所習
者能則喜不能則不憚累日

雲驥乙未第祖母謂其幼且疏率不諳世務令其改就廣文讀
書家大人於雲驥謁選將行因取笥中祖母舊所手點小學二

冊授曰此卽汝終身行已大規模勉之勿負祖母訓

孫雲驩曾孫璧嘗持所誦業呈祖母因訓曰爾等當於讀聖賢
言語時一字一句體貼身心便從幼有根器若止爲科舉之學
則我所不喜

曾孫璧二齡失母祖母鞠之如雲驥日授以書至今璧十六歲
仍每日問所業者作文必視佳惡麟經間問其大義曉否

皇清誥贈夫人馮母傅氏傳

樵李周拱辰撰

分憲馮公奉太夫人與之澱江也無不人膏雨家春臺也
而雪飛柳依之衆亦獲邀孔偕之樂而頌太母之德不衰
一琴一鶴與芝蘭玉樹同其藹淑公退食卽朝太夫人團
坐裁詩作謝庭笑樂時愜然若有思者公跪而問故曰吾
長孫雲驥頎而才他日爲

朝廷用不汝後今其母安在哉且新婦傳善事我於是分憲
公命周子拱辰爲之傳拱辰伏讀狀畧爲之三肅出涕且
敬夫人以小年而能薦於大年也夫人爲少宗伯傅公女

傅夫人傳

故貴也而忘乎爲貴也筭而歸分憲公其舅孝廉貴且溫也而不以貴且溫廢十指勞也分憲公美少年豪舉績學工文辭風華照世不敢以琴瑟媿褻夫子權也於其爲婦也事姑如母於其宜室也事夫子如主君至夢塵稍晏卽買一淑姬陳氏以進曰庶徵蘭乎猶吾子也姬蚤殞哭之如弟已而姪男今訥生已執騷壇爲天下士天之報施善懿故不薄也顧免莊姜之憂而遽罹盛姬之痛柰之何哉臨訣神莊語安了不作繾綣態曰藏壑之舟彭殤同盡耳於生死故翛然也越若干歲膺

朝廷寵若起泉壤而受珩璜冠帔之錫者吾以遶膝珠樹爲
分身符以五色花誥爲返魂香母死矣乎不死矣

皇清誥授通奉大夫廣東布政使司左布政使秋水馮公

誥封夫人馮母楊氏合葬墓誌銘

經筵講官戶部尙書加三級前吏刑工三部尙書都察院掌院

事左都御史年家眷弟陳廷敬頓首拜撰文

賜狀元及第日講官

起居注翰林院侍讀門下晚生陸肯堂頓首拜書丹

賜進士出身翰林院編修門下晚生吳世燾頓首拜篆蓋

余少時伏里中卽聞代郡馮秋水先生以麟經世其家起而爲吏原本經術所歷有聲名余雖不及見公心儀其賢

楊夫人墓誌銘

及後登朝視國子於成均公之子雲驥實分教諸生館下
卒賴君力以佐佑余余以是知長君之賢爲學士攝翰林
篆與庶常諸君相周旋公之子雲驥從授經者數年余又
以知次君之賢次君之子壘少年取科第時過從於邸中
余於是益知馮氏三世皆有文而賢何其盛耶余去京師
兩馮君皆將母家居康熙甲戌冬被

召見壘京師問夫人無恙夫人者秋水先生方伯公之配而大
馮君以叅議辭其官守小馮君以翰林編修請於

朝命朝夕侍養所云將母來諭者也越明年乙亥夫人卒兩馮

君爲狀介修撰胡君孟行以銘來請余與馮氏游舊矣况
重以孟行其曷可辭余乃今知馮氏之三世有文而賢者
皆以夫人也夫人生有貴徵通詩書明大義初歸於馮也
姑太夫人以苦節孀婦時卧疾夫人禮裾不解目睫不交
累日窮年侍益以勤稍間則脫簪珥庀甘毳省侍御服用
以佐夫子所不逮由是方伯公入則承歡出則問學益得
肆其力于翰籍鉛槧之場與當世賢士大夫相交游意雍
容自得也迨舉賢良方正自爲灤州守以至大官夫人未
嘗不從以奉其姑以佐其夫子著短布澣濯之衣辟績不

少休人謂夫人貴矣何苦復爾夫人曰淡泊吾所安且存
不忘亡安不忘危亦欲兒曹體吾意耳其時大馮君已成
進士而夫人戒懼其詞由是方伯公感夫人意砥節勵操
乾乾不懈始終爲世聞人先是順治初公備兵西寧賊數
萬騎薄城下夫人與公約必死當是時編修君始生夫人
屬乳媪曰城破在旦夕我夫婦爲人臣子必死於難此兒
生不幸不能復相顧矣在圍城中四十日而解賊誘之百
端公不爲動由是方伯公堅忠亮之節著櫻城之功世莫
不賢之夫人平居教諸子孫五六歲時皆口授以孝經論

語矻矻晨夕不厭而兩馮君及子姓皆後先策名於時其所造進方未易量余故曰馮氏之三世有文而賢者凡以夫人之故也自方伯公之移疾而歸歸而沒也夫人蚤夜劬心執勤明儉以推恩逮物凡養孤獨無告以百人爲率月人給米一斛病醫藥冬衣裳時其緩急行之三十年所矣余謂馮氏之興未可量者事殆有徵也故非夫人之澤不及此夫人姓楊氏明庚辰進士兵科都給事中恂女孫太學生可植女年十八繼室於方伯公公貴封夫人初公娶傅夫人生參議君四歲而夫人歿遂養於王太夫人及

夫人歸馮而請於太夫人曰新婦當日夜奉太夫人歡柰
何以孺子憂太夫人太夫人無自勞苦新婦自能子孺子
王太夫人喜夫人撫視恩勤並備叅議君迄今狀夫人而
號泣天乎竟奪吾母蓋幾不知夫人之非已出也嗚呼夫
人信賢母已秋水先生諱如京秋水其字官至廣東布政
使司左布政使男二傳夫人出者雲驥乙未進士福建督
糧道布政使司叅議夫人出者雲驪丙辰進士日講官

起居注翰林院編修孫男四璧乙卯舉人壘戊辰進士

梧州府同知歷庠生壘業儒壘幼孫女六人介夫人之狀

以請余銘者編修君典試所得士初編修君之奉

命典江南試也太夫人戒之曰江南人文大邦汝先君舊蒞茲
土也其無隳先子之功汝往慎之哉編修君頓首受命所
取士後對策果以狀元及第則今之介夫人狀者胡君也
夫人言行皆應銘法銘曰世無少君若孟光神明乖違愆
陰陽遙遙賢淑連梓鄉才義殊邈匹配良斷織勸學感樂
羊慈逾所生如穆姜禮宗母師代所望惠班女誠羅綠緇
躬勤餘廩霑翳桑布施福德能思量儒門淡薄家風長象
未陵葵邪熾昌懸鼓定水皆微茫優曇鉢花難再芳考終

往生理則常爲世標景爲津梁我銘懿行心洋洋金石可
泐詞無傷

皇清敕授文林郎 日講官 起居注翰林院編修改禮科給

事中懿生馮公暨配

敕封孺人馮母魏氏合葬墓誌銘

賜進士出身吏部右侍郎兼翰林院掌院學士教習庶吉士前

通政使司左右通政順天府府丞鴻臚寺少卿戶科掌印

給事中丙戌會試同考官提督河南通省學政刑科給事

中翰林院編修庶吉士門年眷姪湯右曾頓首拜撰文

賜探花及第左春坊左中允兼翰林院編修門生黃夢麟頓首

拜書丹

魏夫人墓誌銘

賜同進士出身翰林院檢討門下晚生梅廷對頓首拜篆蓋

孺人姓魏氏故四川保寧府巴州知州諱步南公女授文
林郎禮科給事中馮公諱雲驩之配也先是戊辰余試南
宮與孺人之長公敬南同出今大司寇韓城張夫子之門
兩人交相善及余就館選給諫公方以前輩負宿望余獲
以年家子追隨過從無虛日以故知馮氏爲甚悉歲庚辰
余哭給諫公於京邸甲申敬南歿余哭之過時而悲後十
二年孺人攜諸子寓京邸構疾卒余又走哭如前儀今年

春瓜子塵等以狀來請銘且曰君與先君子及先兄交幾

三十年知余家者莫如君銘之莫如君宜余受狀讀既竟
不覺喟然嘆曰若孺人者真可謂孝于事親敬以相夫而
能以義方訓子者雖古女宗何以加茲孺人幼聰慧雖不
甚讀書然性通曉知大義馮氏自給諫公之父方伯秋水
先生以文章政事起家三晉之稱家法者以雁門馮氏爲
最當世如魏敏果公陳文貞公吳文端公數數稱羨不置
孺人年十三歸於馮氏言動無少戾方伯公喜曰此真吾
家婦也時王母王太夫人春秋高性頗卞急孺人周旋進
退未嘗有忤色及方伯先生沒給諫公自爲孝廉以迄宦

魏夫人墓誌銘

卷

游孺人秉家政事其姑楊夫人寢膳之節厠踰之細無不
曲盡給諫公爲孝廉讀書至丙夜不休孺人常秉宵待旦
視茶湯初未嘗倦也以至官吏局改諫垣輦下米珠薪桂
之地孺人日拮据供宴好恤婢僕且以大義相敦勉曰吾
家受

國恩厚矣富勉思報稱家事吾自辦慎毋以此分其心也給
諫公卒無內顧憂訓諸子嚴而有法丸熊畫荻不肯纖毫
假易以故敬南弱冠成名進士自甲申後寓京師次子

歷等所交游率一時名士每延客飲饌必躬親之極豐極

潔諸子以勞勩辭孺人曰汝輩但能親正人遠比匪苟自振勵吾顧不以此爲勞也卒不懈辛卯子歷及孫元方光裕舉於鄉甲午孫允升祖寬歌鹿鳴孺人顧之色喜曰吾家世以文學顯幸不辱先人則未亡人亦可見先人于地下嗚呼若孺人者其於母儀婦道可謂無愧自當享大年逾耄耄見諸子孫繩繩振振乃忽構疾以卒其可哀也已孺人生於順治八年九月二十一日卒於康熙五十三年十一月三十日享年六十四歲以

覃恩封孺人子四人長壘戊辰進士廣西南寧府同知卽余同

門生敬南也次歷辛卯舉人次舉貢生早卒次監候補府
通判女子五人俱早卒丙子舉人張嶼今通政使司左通
政黃叔琳戶部司務高兆麟庠生張鎬其壻也諸孫十一
人敬南出者三曰元方辛卯副榜壬辰教習允升甲午舉
人光裕辛卯舉人祖悅祖亮俱庠生歷出祖寬甲午舉人
舉出次九臯祖彭先復堯臣祖忱祖吉俱幼歷出者一舉
出者三監出者二孫女五人曾孫男女六人將以康熙五
十四年九月初四日與給諫公合葬於花家莊之祖阡銘
日月之光兮婆之輝母訓婦範和中闈孝敬仁愛均無違

子孫奕奕鸞鳳飛星凋月掩千年歸覲夫子兮無愧儀祔
於幽窆神永依刻貞石兮圖音徽

魏夫人墓誌銘

卷三

皇清誥封宜人先妣田太君行述

嗚呼痛哉吾母竟棄

不孝元方

等而長逝耶

不孝

等自甲

申遭先大夫喪煢煢孤立家室漂搖日惴惴有不自保之

虞吾母以一身支柱

不孝

等日依膝下相恃爲命數年來

稍有寧宇冀吾母從容強飯以幾期願

不孝

等亦得長侍

慈顏以稍盡菽水之養孰謂先大夫棄世一紀吾母又棄

不孝等而長逝耶

不孝

等年甫逾立恃怙靡依孱焉苦塊

之中迷瞶昏亂何能更事筆硯然使吾母芳躅懿行湮沒

不彰

不孝

等罪且滋大謹忍死泣血畧述梗概惟當世

田夫人行述

大人君子採覽焉吾母姓田氏馬邑辛丑進士內閣學士兼

禮部侍郎

諱

喜霽公次女年十六歸先大夫動止言笑端

慤如老成人問安視膳克循婦道先曾王母楊太夫人及

先王母魏孺人喜曰新婦殊不愧名家子亦真吾家婦也

戊辰先大夫成進士先王父以編修陳情里居時楊太夫

人春秋高先大夫及吾母爲楊太夫人所鍾愛吾母日佐

魏孺人侍茶湯供浣濯未嘗頃刻不在左右也魏孺人秉

家政指繁而務殷吾母時代爲整齊之豐儉咸適其宜族

黨之親僕妾之輩皆嘆羨以爲少年能更事如此庚午先

王父卧疾都門病甚先大夫及吾母奉楊太夫人於家日
焚香默禱茹蔬食淡願以身代及侍楊太夫人側則強驩
笑如平時至先王父病愈初不令楊太夫人知也先大夫
官內閣中書輦下米珠薪桂之地鳳池清著俸入不足以
贍累重先大夫性復喜交游吾母日拮据攝辦不使稍有
缺乏雖至脫簪珥鬻衣物無幾微見於顏色及先大夫仕
廣西梧州府同知粵號險遠吾母上侍先大夫下撫不孝
等一切衣服飲食皆躬自經理曰此遠方風土異宜一不
慎得毋貽家中兩高堂憂乎先大夫以才能見知撫臬諸

公凡有疑案難決獄屬先大夫吾母日夜孜孜以仁恕相規
勸先大夫多所平反間有情罪決不容寬者吾母與先大
夫未嘗不愀然移日也後遷南寧地日遠宦况日益困益
緣兩郡丞既無所事而先大夫素性尤嚴請謁禁苞苴吾
母亦以義命自安曰但得爲清白吏毋墜家聲賢於厚積
遠矣及聞先王父喪先大夫痛不欲生食飲不進者累日
吾母以大義相慰解曰毀不滅性將如魏孺人何萬里之
外舟車僕馬之費維艱吾母拮据攝辦一如官中書時先大
夫歸里營葬甫畢踰年而沒吾母誓將相從地下念

不孝

等孤幼無依且弱妹三人未離襁褓者二每一慟哭絕而復甦者數四又念魏孺人年高曰忍復以諸孤遺累老人乎雖勉存視息然自此遂感嗽病至沒竟不能痊前年先王母沒吾母支沉床褥者已久一切喪葬之事猶力疾經營不少怠或以稍節勞勸吾母正色曰是寧可諉疾時也先五叔夫婦早沒所遺幼子弱女吾母咸爲經紀撫育之今年七月間婚嫁之事龜勉萬狀吾母不憚勞不恤費力任其事婚嫁甫竣而心血愈告瘁矣以九月五日成氣怯之症延醫調治參苓罔效至於十七日竟不起嗚呼痛

哉吾母雖生於貴盛之門歸於仕宦之家然性勤儉辨明
而起溫清外一切米鹽細事不肯假手於人自奉甚薄衣
經屢浣至紉補猶不肯易食不肯有兼味至先大夫沒念
不孝等祖父無厚資以相遺食指日衆并衣損膳及有賓
客則供饌具庀樽罍極豐極潔嘗曰吾固不敢比踪陶母
汝輩但能親正人遠比匪稍有成立庶不負吾數年來苦
心也少知大義性至孝待人溫恭和易雖有犯者亦不校
馭子姓婢妾亦無怠色遽容暇則誦經禮佛或爲子孫述
古賢孝事以爲訓先外王母得癆症吾母衣不解帶者數

年篤於手足自先王父母及先大夫捐館舍吾母心已傷
神已瘁又兼舅氏四人零落僅存其一其痛徹心膂者已
多雖後先大夫十二年而沒然其間經營兩喪子姪婚嫁
皆吾母罄率箱篋左支右吾刻無寧晷並不得享一日之
安不孝等復不肖不能自立既不能免漂搖之憂又不能
博升斗之養不孝等之罪通於天矣不孝等尙忍言哉沒
之夕言語不亂處分身事如平時至五鼓危坐而逝嗚呼
痛哉吾母生於康熙五年丙午八月初八日子時沒於康
熙五十五年丙申九月十七日寅時享年五十有一以先

大夫官梧州府同知恭遇

單恩誥封宜人子男三長卽 不孝元方 辛卯科副榜壬辰教習

娶王氏太子太保戶部尙書 諱 宏祚公會孫女工部員外

郎諱瑜公孫女廣西柳州府通判諱世清公次女 不孝允

升甲午科舉人出繼先伯父亞魁公後娶張氏太子少保

廣西全省提督諱旺公姪孫女遊擊將軍諱自虎公女次

不孝光裕 辛卯科舉人揀選候選知縣娶王氏國子監典

簿諱觀光公女女三長適候選訓導黃公諱叔度子庠生

秉釋次適庚辰進士現任陝西西安府長武縣知縣劉公

諱愨子太學生帝舉次許字河南河南府知府張公諱珩

孫候補府同知諱鵠子天眷孫男二 一和一鄴俱幼未聘 光裕

出孫女二俱幼未許字 元方出者一 光裕出者一 不孝等

擗踊哀痛之餘語無倫次未能縷述萬一仰祈

大人君子哀而賜之銘誄以光泉壤則 不孝等世世子孫感

且不朽

孤哀子馮 元方泣血稽顙謹述 光裕

降服子馮允升

皇清敕封安人

誥封恭人顯妣馮母蔣太君行述

嗚呼痛哉吾母竟棄

不孝祖悅

等而長逝耶

不孝祖悅

等

辛酉冬遭先大夫之變方謂吾母在堂承順慈顏依依膝

下乃未及二載而復罹此慘毒

不孝

等罪深惡極胡天不

降罰而反奪吾母之速耶

不孝

等無父何怙無母何恃誓

當從吾母於地下以報罔極第念喪葬大事未克襄舉弱

弟幼妹均未成立且吾母之嘉言徽行可以爲女宗母範

者若湮沒無傳則

不孝

等罪滋大不得已忍死須臾血淚

濡毫謹述梗槩仰冀

蔣恭人行述

當代大人採擇焉吾母姓蔣氏世爲山西平陽府臨汾人閩

閱簪纓代稱巨族至先外曾王父諱宏道公始貫籍於順

天府之大興縣由順治丁亥進士歷官左都遂爲大興之

望先外王母 晉恭人艱於嗣獨生吾母幼而端莊不苟

言笑先外王父母鍾愛特異六七歲教以詩書咸能記誦

講解史鑑通曉大義今家藏古今全史卽吾母幼時所誦

讀也先王父黃門公聞其賢淑爲先大夫求聘先外王父

器重先大夫世家子弟能讀書遂許配焉年十八歸先大

夫兩家門第鼎盛聘嫁之貲炫耀一時人豔羨之而吾母

以裙布荆釵自居絕無富貴驕人之念時先曾王母楊太夫人在堂吾母克執婦道婉婉中禮先曾王母謂先王母魏太夫人曰大家閨秀信不虛也先外王父以都中甘脆之物頻頻寄遺吾母受之悉獻先王父母佳時燕饗用以佐具人或詢物所從來先王父母道其故親故鄉鄰嘖嘖嘆羨卽先王父母轉賜者吾母亦必擇其可藏者藏之以備燕饗不時之需從未嘗敢以母家寄遺之物私有所用也乙亥先曾王母卒吾母侍先王母居喪誠敬有加奉承維謹先王母益愛重之丁丑先王父服闋起復先大夫卒

吾母隨侍入都其時先外曾王父致仕家居先外王父官部曹吾母奉事尊章歸寧父母天倫聚順人咸嘆其難得庚辰先王父捐館先大夫毀瘠骨立吾母哀慟之餘晨夕護持時以先王母在堂婉言勸慰吾家自先王父沒後家道中落又先大夫時運淹蹇久困場屋先王母居恒鬱鬱吾母先意承志侍食之暇爲誦傳奇小說以博其歡雖至夜分不形倦色先王母以是怡然自得吾母亦欣然慶幸焉辛卯先大夫中順天鄉試吾母喜動顏色曰鹿鳴初試不足爲君賀得此以慰老親深可喜也先大夫僑寓都門

薪桂米珠日給不足吾母悉出嫁時粧奩陸續典鬻以資
費用家人輩或有勸其稍爲藏畜者吾母笑曰物之成毀
原有定數寧坐視困乏而徒留此不急之物乎癸巳先外
王父母由廣西赴四川新任行至桂林感瘴癘相繼卽世
吾母聞訃慟哭幾絕先王母亟慰諭之始勉自節抑請命
成服哀慕雖殷而每詣先王母前未嘗不强爲歡容也甲
午先王母寢疾吾母同先大夫日夜守視親奉湯藥及卒
哀慟迫切居憂盡禮愛敬之稱人言無間而吾母終以孝
養未遂爲歎先大夫屢躋公車家徒壁立吾母粗衣糲食

蔣恭人行述

毫無怨尤惟勗不孝等早成名以慰親心不孝等下帷攻

苦吾母於飲食衣服之細顧復恩勤惟讀書課程不稍姑

息督責嚴切訓誡丁寧人咸謂有古賢母風甲辰不孝祖

悅成進士吾母喜曰吾生汝無愧矣丙午先大夫授內閣

中書不孝祖悅授戶部主事吾母謂不孝曰汝父子同登

朝寧可稱盛事然

君恩高厚報稱實難慎勿曠官守以隳家聲也庚戌不孝祖悅

出守甘郡壬子年迎請吾母來署署中八事吾母雖不與

聞而不孝逐日辦事恒默加體察稍涉偷安卽以大義責

之每不孝出廳視事必先戒之曰居上臨下最怕任性果

得其情刑可不用卽不得已而用刑寧輕勿重寧少勿多

三木之刑更宜詳審以故不孝蒞甘九年按事悉心研鞠

從未輕用三木者遵吾母之訓也不孝觀民銓選福建建

安縣縣丞吾母自甘手諭戒之曰縣丞雖微亦沾一命之

榮須努力自愛以圖上進及卓異推陞復切諭曰汝初任

三載卽叨正印此皆

天地祖宗默佑非汝之能切勿志得意滿改弦易轍知縣親民

非縣丞比也不孝祖悅陞任平慶未幾調任洮岷吾母

蔣恭人行述

喜謂不孝曰汝兄弟有何德能得此異數當共相敦勉仰

報

朝廷時先大夫已以刑部主政引疾歸不孝祖悅迎請來署吾

母相見慰候高堂具慶子孫環繞觀者健羨以為兩老人

福德所致綿綿正未有艾也豈意不孝等福薄罪深先大

夫自岷旋里於辛酉年十月見背訃至岷吾母痛不欲生

水漿不入口不孝昏憤之際惶懼泣慰雖勉為進餐而春

秋高素羸弱中心鬱結精神自此頓減矣吾母好事佛持

準提齋朔望禮拜率以為常每逢諸佛菩薩誕日必齋戒

茹素一月之間幾無虛日不孝等以高年勸止之吾母曰

吾性所安不以爲苦也先外王父子兩舅父俱清貧株守

初不孝祖悅備員戶曹奉有各保一人之

旨先大夫同吾母因季舅父有從政才命以名上應遂得

簡用現今以州同管江南揚州丁溪場鹽大使事不孝祖悅任

甘州時長舅父來甘吾母知其練達留署助理衣食日用

多方周給由是兩舅父各自樹立不致廢墜先猷者吾母

之功也待庶母李氏寬厚含容儀節稍疏不相責望庶母

亦深感母慈奉事謹恪閨門之內雍雍如也至於家人婢

蔣恭人行述

僕輩使令服役備極恩慈有過則開誠訓飭不加扑責其
子女或嬉戲喧呶絕無厭惡稍有疾病卽親往看視嘗謂

不孝

等曰人之子女無異我之子女憐愛由衷非要譽也

吾母去歲五月自岷抵里

不孝祖悅

因公羈滯甘省七月

聞姪

郡

西來詢問吾母起居云頗健旺

不孝祖悅

歸見吾

母容顏飲食無異平時

不孝

等私相額慶以爲期願可望

詎料今歲正月內遭疾投以參苓旋效旋否纏綿三月竟

成不起

不孝

等罪孽日積叠罹閔凶死有餘辜生何以堪

耶嗚呼痛哉吾母生於康熙十二年七月二十八日子時

卒於乾隆八年三月二十九日申時享年七十有一恭遇
覃恩赦封安人

誥封恭人原任四川川東道按察使司副使先外王父諱申錫

公長女原任都察院左都御史先外曾王父諱宏道公長

孫女子四人長卽不孝祖悅甲辰進士原任整飭洮岷兼

轄隴右分巡屯田道按察使司副使娶李氏候選縣丞諱

恒炳公次女繼娶李氏諱恒炳公三女再娶李氏庠生諱

阜公女再娶張氏原任鴻臚寺序班諱鈐公女俱先卒聘

戈氏原任山西朔平府知府今終養諱鳴岐公女次祖亮

蔣恭人行述

庠生娶李氏壬午舉人原任洪洞縣教諭諱藝公女繼娶

田氏候選訓導諱公女俱早卒次不孝觀民推陞陝

西西安府興平縣知縣娶徐氏現任河南陳州府商水縣

典史諱鳴公女繼娶李氏庚子舉人揀選知縣諱雋望公

女俱吾母出次不孝亢異太學生娶張氏原任湖南布政

司理問諱鶯公女庶母李氏出女四人長適原任浙江嚴

州府淳安縣知縣陳諱以訓公子原任雲南晉寧州知州

九疇吾母出餘幼未字庶母李氏出孫男七人長郡六學

生娶李氏候選府經歷諱整公女祖亮出次部業儒聘李

氏現任江西南昌府南昌縣縣丞諱屋公女次郊業儒聘

陳氏原任雲南晉寧州知州諱九疇公女俱不孝觀民出

次郊業儒未聘次郊業儒聘張氏現任甘肅肅州九窰州

判諱廷元公女次邵幼未聘俱不孝祖悅出次邵幼未聘

不孝亢異出孫文二人長適原任湖南布政司理問張諱

鷺公孫辛酉舉人諱永錫公子鈞次適候選州同張諱翺

公孫卽用縣丞諱天昇公子鑑俱不孝觀民出曾孫男一

人廷丕幼未聘曾孫女一人幼未字俱郡出不孝等慘遭

異變脊亂荒迷苦次敘述不無掛漏伏祈

蔣恭人行述

大人君子俯鑒哀忱寵賜銘誄以爲闡範之光則不孝等世

世子孫啣感不朽

孤哀子馮

觀民
祖悅
亢異

泣血稽顙謹述

皇清誥封恭人元配張氏行畧

嗚呼恭人歸予歷今三十七載其事親以孝教子以義待
下以寬居家崇儉秉心和厚持躬淑慎閨範家箴終身守
之而不易誠爲巾幗所難余不忍泯沒因敘其大畧以與
當代大人先生採擇焉恭人姓張氏祖居崞縣原任河南府
知府先姑文諱尹公季女也先姑母爲先王父方伯公先
王母楊太夫人最鍾愛者慎於擇壻一時貴顯求聘甚衆
獨於先姑丈奇之卽以先姑母歸焉先姑丈任永福令時
生恭人恭人幼而聰慧稍長曉通禮儀舉止端嚴隨先姑

張恭人行畧

丈丁艱回籍先考黃門公及先妣魏太夫人見卽甚愛之
語人曰此甥女幼秉德性必有厚福康熙丙戌歲余兄弟
奉先太夫人僑居都門適先姑丈以彰德府同知解餉入
京時余方議婚遂遣媒聘定丁亥之歲太夫人親往彰德
迎娶恭人于歸之日太夫人因先黃門見背洒淚教之偕
歸都門太夫人以余年少未能自立命居寢室之右時家
門多故加以都門米珠薪桂太夫人日夕經營憂鬱勞瘁
而恭人每事皆曲伺顏色仰承慈意旦晚定省必多方排
解太夫人爲之解顏事無大小必稟命太夫人及諸長嫂

然後敢行余時攻舉子業太夫人丸熊畫荻之餘恭人則
作女工以相勗深夜不倦未嘗一日稍怠壬辰歸寧洛陽
官署聞先五兄之變恭人念太夫人悲傷遂稟命先姑丈
星夜馳歸太夫人許以知禮常語人曰媳待吾如母吾亦
以女視之甲午秋太夫人偶患脾病恭人手調湯藥早晚
粥菜皆親捧進太夫人疾篤展轉扶掖以及洗滌便器皆
躬任之不假手婢媪十一月三十日太夫人見背恭人哀
毀廢食不起者匝月居喪禮節皆隨長嫂以爲矩矱乙未
扶柩回里抵家之日恭人以哭太夫人故病不能履地然

猶勉強自持一應禮節未嘗少缺服闋後隨余謁選入都

僑居驪馬市大街時夜遇巨盜執長子

忱詹

以呼門恭人

語余曰夫子爲重子且勿計也而

忱詹

卒保無恙其靜鎮

爲人所難太夫人在日亡姊二人遺子女各一皆代爲撫

養恭人仰承慈意教誨愛護更甚於前族黨無不嘉予恭人能體太夫人遺意也庚子歲余初筮仕選授福建福州

府通判到任後署理府篆適值承審臺灣逆案囹圄爲滿恭人每以平反超雪反復諄諄余固不忍人也聞恭人言

益留意是時羽書晝午刻無寧晷每至日哺尙未能一餐

恭人因余未食不敢舉箸輒枵腹以待飲食過時遂成胃
氣之症是時先姑丈解組林下恭人請命於余時致書問
候并寄金以爲壽先姑丈下世時所寄金猶有在篋者先
姑丈訃音至聞恭人哀毀悲痛以余攝篆他出未敢易服
遂衣極粗布衣外覆以墨色常服茹素累月每飲泣曰吾
欲盡禮而勢有不能惟令此身無一恬適處以少酬罔極
耳癸卯歲予膺計典卓異陞授泉州府廈門同知乙巳秋
余因公徃省八月二十五日夜有匪類聚衆殺傷官軍事
起倉猝恭人閉戶下鍵引刀繩以自矢令家人各自爲計

幸官兵擒捕殆盡卽得安全次年丙午余被呈議離任寓
居溫陵當賠累之後薪水不繼恭人絕無難色不以匱乏
相告惟搜篋典售以資日用盤殮相對並無一嗟嘆之語
余處困窮歷七年之久而若忘其困者恭人內助之力居
多癸丑歲余蒙閩省大憲保題次年春至都引

見奉

特旨擢守台州恭人自閩至都復由都至台南北奔馳不以勞
瘁縈念惟以事余爲重台郡政事殷繁一切家務巨細皆
恭人綜理悉存寬厚撫育子孫惟慈祥方正庶出子女更

爲鍾愛下御臧獲僕婦悉本寬和有過則勸勉而已未嘗
疾聲遽色也因祈保余身每月繡佛茹素十居六七而尤
以殺生爲戒乙卯歲先兄六旬初度余先期致賀所寄衣
皆恭人手製或有勸之者恭人曰吾非好勞也夫子只此
一兄老年手足不可多得聊以將敬而已丙辰春余辦銅
赴省至蒿壩猝染時疾養疴蕭寺恭人在署聞知爲之寢
食不寧余疾畧退回署意始稍寬凡飲食藥餌恭人必躬
自調煎以進從不假手婢僕時恭人嘗患痰喘雖疾發不
欲與聞於余己未之夏余遵

六日輪流入覲將行恭人屢言都門往返六千餘里車馬勞頓飲食寒煖非僕從能堪任者固請偕往余因懇摯遂從其請行次邵伯月黑暴雨恭人所乘騾輿僕夫不戒度橋前馳失足連輿墮橋下橋高二三丈幸河水方涸得以無恙恭人慮余驚惶轉以婉言勸慰若不介意者往返半年長途服食無或失時皆恭人營護之力辛酉秋余又蒙准卓薦入都恭人亦如已未年偕行且言便道回籍亦可越理家務抵都門聞先兄之變慮余過悲未及歸里勸令南返適三舅兄原任湖南布政司理問諱鶯四舅兄前貴州道監

察御史現任禮部儀制司員外諱鵠朝夕相聚恭人素患

喘證雖發時亦未嘗不勉強笑言其篤手足之誼又如此

時遣長子忱詹回籍助理先兄喪事並料理家務囑咐靡

不周至余是年臘底方至武林以公事留省至壬戌初夏

始回台署恭人操理家政不辭勞瘁是以余守台九載得

無內顧之憂恭人舊疾時發加以調攝雖不能去體亦不

大劇詎期今春二月二十三日偶因感冒舊疾復發次日

疾甚時值三舅兄鶩在署入內問疾恭人披幃相見猶強

作笑容以慰兄意迨夜半彌留之際兒媳輩環侍榻前進

張恭人行畧

獨參湯恭人問之以實告因指帳外舌短氣促語含糊莫辨細繹之方知以余竟夕縈心勞頓命卽以參湯奉余也語不及他竟爾淹然逝世嗚呼悲哉雍正元年

覃恩敕封安人乾隆元年

覃恩誥封恭人生於康熙丁卯年九月十七日寅時於乾隆癸

亥年二月二十五日卯時終於台郡官署內寢享年五十

有七子三人長

忱詹

太學生娶霍氏原任廣西提督

諱

昇

公女次

覲吉

太學生娶羅氏康熙丙辰科進士原任福建

鹽運使

諱

衍嗣公孫女候選州同知

諱

杲公女俱恭人出

次親錦尚幼聘汪氏現任江南分巡蘇松兵備道諱德馨

公女側室許氏出女二人長字原任刑部尙書謚敏果魏

諱象樞公會孫翰林院侍讀學士原任江南學院諱學誠

公孫現任福建邵武府知府諱素公次子太學生松實次

未字孫男五人俱幼長鄭未聘觀吉出次鄭聘張氏卽內

兄諱鴛公孫女乾隆辛酉科舉人諱永錫公女忱詹出次

鄭聘董氏現任廣東惠州府同知諱承焯公女次鄭聘莊

氏雍正甲辰科會魁原任直隸宣化府西寧縣知縣諱敦

厚公孫女太學生諱貽芑公女俱觀吉出次鄭未聘忱詹

張恭人行畧
六
卷三

出孫女二人長字張卽內姪諱永錫公子銜次字張卽內

兄諱鶴公孫太學生諱天眷公子鑾俱覲吉出余愧不文

謹據其大畧惟懇

大人先生錫之銘誄以光泉壤則感且不朽世世子孫亦感

且不朽

杖期生馮墜技淚拜述

皇清誥授通議大夫廣西按察使司按察使訥齋馮公暨配

誥封淑人馮母王太君側室

敕贈孺人馮母蘭太君合葬墓誌銘

賜進士出身中憲大夫翰林院侍讀學士年家眷晚生嘉定錢

大昕頓首拜撰文

賜進士出身承德郎右春坊右中允年家眷晚生富陽董誥頓

首拜篆蓋

賜進士出身奉政大夫翰林院侍讀年家眷晚生潞水王大鶴

頓首拜書丹

王淑人墓誌銘

誥授通議大夫廣西按察使司按察使代州馮公訥齋先生之

夫人

誥封淑人王太君世居江南之上元縣 太子太保戶部尙書

端簡公宏祚之曾孫刑部雲南司郎中瑜之孫廣西柳州

府通判世清之女而廣東布政使司左布政使如京之曾

孫婦翰林院編修禮科給事中雲驢之孫婦廣西南寧府

同知璽之家婦也淑人內外兩家皆世族柳州與南寧同

官相善故夫人歸於馮南寧奔父喪盡室歸里淑人始得

拜見王姑魏夫人姑田夫人皆喜曰江南新婦動止有禮

法及居舅姑喪哀敬盡禮宗族皆賢之訥齋先生以名進
士由州縣敷歷按察淑人常從任所治家事內外井井故
公得一其心於職事爲時名臣公年逾四十未有嗣淑人
爲置側室藺氏生子郁晨夕撫視若已出公之仲弟允升
官嘉禾縣知縣夫婦相繼歿遺一子二女淑人親撫養之
教誨婚嫁雁行侍膝下童僕新至者不知其爲從子也公
旣卒官粵西淑人扶櫬歸里營窆安華家莊先塋之旁曷
子以讀書立品無墜先人志子郁以從三品廕生授河南
閩鄉縣知縣將迎淑人就養淑人聞闔鄉清貧恐以私養

妨公務竟不往每獻歲閩鄉使至致安石榴木瓜一二種
淑人必問物何從來答以同僚見遺或署中所產則喜或
誤答以紳士餽遺輒不懌貽書戒曰此包苴之漸不可不
慎也郁以是益自勵用廉幹調儀封縣咸曰賢母之教云
淑人年八十餘神明不衰燈下猶能治鍼綫齒落者僅一
二卒於乾隆三十五年八月十日春秋九十子一卽郁也
女一適辛未進士廣西左江道李天培孫男四人廷堅廷
望廷圭廷翌今郁以乾隆三十八年二月二十三日合葬
淑人於按察公之兆屬其從子刑部郎中浙江寧紹台道

廷丞來乞銘予與郎中以道義交故得悉淑人之族世銘
曰尙書之門有淑女廉訪之門有內主仙吏之門有壽母
祔葬同穴歸其所以德受福昌厥後

皇清敕封孺人馮室張氏墓誌銘

賜進士出身吏部驗封清吏司主事年眷弟康忱頓首拜撰文
賜狀元及第翰林院修撰 內廷供奉年眷弟于振頓首拜書

丹

賜進士出身河東都轉鹽運使司運同門年眷弟王又樸頓首

拜篆蓋

孺人張氏遊擊諱自虎之女癸卯進士原嘉禾知縣馮君
惕齋名允升之配也其卒以雍正丙午四月二十七日其
葬以是年九月其兆耐花家莊之祖阡其年四十有五其

張孺人墓誌銘

卷二

子男鄰女二俱幼馮爲代州甲族五世繼以科第顯自惕齋之曾王父方伯秋水先生教家嚴肅婦孺咸有儀法三晉之稱世家者必曰雁門馮氏孺人幼端慤舉動有禮父竒愛之嘗曰兒當爲名門婦年十八許字於馮及歸翁奉政已先世家計零落風雨飄搖姑田宜人一身枝柱惕齋與其兄訥齋弟損菴定省外篝燈下帷雜誦不輟而孺人始媵咸能損衣并食推逸任勞凡饘爨朝夕米鹽瑣細之節靡不奉田宜人之命唯謹不數年惕齋弟兄奮身科名克光前業不墜旣田宜人歿友愛不衰同居無間言無私

蓄如田宜人在也鄉里以爲難田宜人以勞瘁病嗽孺人
晨夕左右未嘗有怠容燈明長夜每絮語家門舊事間及
女儀內則之訓孺人扶持抑搔婉婉聽受以爲娛樂田宜
人憐愛之嘗語孺人曰汝數娠不舉然終必有子大漸之
夕取金鈴釧付之曰俟汝有子繫其臂恨我不及見也已
而果然惕齋之令楚南也期年謝病歸孺人從容語曰君
兄弟清勤報國不以家累自隨微君歸百口將誰賴乎且
君嘗欲舉方伯公家規訓示子姪今姪輩幸漸長成而吾
猶及侍先姑以所聞者佐君朝夕陳說使其童而習焉男

有室女有家庶不替馮氏孝友之風乎未幾孺人遘疾卒
嗚呼若孺人者年雖不逮斯克稱其爲雁門馮氏之婦也
已秋七月惕齋馳書以銘請余與惕齋同舉於鄉得徧交
其昆季遊擊余同里人故習聞孺人之賢而於馮氏家世
尤得其詳是爲銘銘曰 耐田宜人墓趾如堂距阨十
年依依今再始何以告姑婦有子何以願婦世張似子子
孫孫雁門馮氏吁嗟我銘質且俚

游士子長
汝霖配即凡若身女

方岳字巨山配即琴伴子女
直持寧夜孔唐友
恩昭華 主印也士

有室女有家庶不替馮氏孝友之風乎未幾孺人遘疾卒
嗚呼若孺人者年雖不逮斯克稱其爲雁門馮氏之婦也
已秋七月惕齋馳書以銘請余與惕齋同舉於鄉得徧交
其昆季遊擊余同里人故習聞孺人之賢而於馮氏家世
尤得其詳是爲銘銘曰 耐田宜人之墓趾如堂距凡十
年依依今再始何以告姑婦有子何以願婦世張似子子
孫孫雁門馮氏吁嗟我銘質且俚

國家驅策乃偷安鄉井非所以繼汝父未竟之志不孝

祁雖

迫於慈命然未忍遽違朝夕間從視膳之餘見入春以來

吾母飲食起居較前殊康健私心因得稍慰歲朝後慈命

益厲令促裝祁不得已留婦劉氏侍膝前以二月初三日

啟行牽衣拜別詎意長征之日卽爲母子永訣之時耶抵

京六日未供職訃音猝至五內崩摧向使行期稍緩縱不

獲長侍親闈亦可躬親含殮何至終天抱恨身爲鮮民生

不如死尙可自立於人世哉顧吾母淑德懿行足垂彤管

倘致湮沒則不孝之罪滋大用敢吮血和墨畧述梗概以

備

當代大人君子採擇焉吾母姓王氏京師望族世居順天之

吉陽村外曾王父

諱

公耀公鴻臚寺序班家貲豐殖有陶

朱計然之能而世有厚德不敢以素封驕人外王父

諱

覲

光公歷國子監典簿孝友睦婣鄉人稱之外王母朱孺人

爲典簿公繼室生三女吾母其次也先曾王父黃門公先

王父司馬公累世官京師夙稔吾母令淑遂爲先大夫委

禽焉年十九歸先大夫是時黃門公司馬公俱卽世廟見

後以不逮養爲憾歲時烝嘗魚菽虔恪家人見者咸凄然

王夫人行述

卷三

感動時先曾王母魏太夫人先王母田太夫人並在堂田
太夫人婦德母儀夙著鄉國吾母隨兩伯母後孝養承志
咸能得其歡心乙未魏太夫人棄世丙申田太夫人棄世
兩世喪葬萃於一時又遭家不造風雨漂搖先大夫暨兩
伯父措拄於外吾母暨兩伯母襄贊於內總持家計豐約
適宜至今人頌先大夫得內助之力焉大伯母王淑人生
於南先二伯母張孺人生於西吾母生於京華五方氣稟
不齊而姊妹媿媿無間於故先人手足之愛數十年如一
日人頌先王母持家之肅尤頌吾母相夫之賢識者兩多

之雍正癸卯先大夫簡用雲南授大姚令歷黔銅仁府同知旋授滇永北府知府調麗江先大夫夙夜在公不問家政已酉授雲南驛鹽道吾母始從山右隨任筭珈象服而勤儉操作不異曩時織紉烹飪無間巨細悉躬親焉由是先大夫益得一意旬宣敷歷滇黔陟廉使晉方伯爲西南屏翰已未

今上以先大夫簡任舊臣賢勞丕著

特命巡撫湖南沅湘幅幘廣濶風俗凋敝綏戢爲難先大夫抵楚後加意振刷時苗疆不靖軍興旁午食少事煩以死勤

王夫人行述

事先大夫舊有痰疾每勞必發吾母委曲調護心力交瘁
迨先大夫疾革楚南卒以是症而吾母之恙亦自此深矣
先大夫捐館後吾母携不孝等遠道間關扶櫬抵家

天恩稠疊

敕賜祭葬吾母追先大夫清白家風準情酌理無僭無憾親知
族戚以及故吏門生遠近赴弔者莫不涕泣咨嗟以爲罕
覩終喪後含飴弄孫聲不出戶而一門之內臧獲大小皆
循禮法執事惟勤則儀型有素也先大夫位躋通顯篤於
契誼輕財好施家計有無盡費於交遊姻黨之間遇女生

急難致力未能給養者母必脫簪履以其行其志故歷宦十
七載故園未嘗增二椽之屋二畦之圃也夫夫夫總藩建
節以

令上董恩

勳命優褒吾母並膺

綸誥宗族鄉黨咸以爲榮吾母獨安之若素尤不喜鮮服女婦
輩或微言諷勸卽恚曰自吾事田太夫人未見吾姑數易
新服吾敢與輕紆重錦示子孫以儉乎作法於儉尙恐
其奢律法於奢伊於胡底諸女婦咸聽命至今銘勒不敢

王夫人行述

忘又性習勞不自暇逸見婦子勤劬則慰勞備至或嬉遊
則勸責之既抵家適年不孝_祁等見吾母朝夕課績視前
在署中時尤勤瘁因從容叩請祈委家事於婦輩以期節
勞母曰若輩年少未知稼穡艱難且吾性安之矣無爲我
慮總家政如故也初外王父家鼎盛自典簿公歿後家道
中落外王母朱孺人居京師吾母從先大夫遊宦遠方有
北使餽問必謹及卒命不孝_祁等經理喪葬無遺憾舅氏
誅歿亦如之外弟承裔孤苦賴吾母底成立長妹倩張寧
禧夙染瘋疾而家又不振吾母飭不孝_祁等多方護視藥

餌及病篤筋備後事歿復經紀其喪不孝_刑等於去年春

仰遵慈命置田莊一坵住房一所付長妹執業庶幾稍可

存濟而吾母之慮遠謀長於張氏實始終以之矣吾母性

嚴毅訓子孫必以義方雖幼穉詞色無少假借而又極慈

愛不孝_刑次子廷宣生而聰穎眉目如畫吾母愛如掌珠

庚申三月以痘殤於湖南撫署吾母痛惜哀思歷久勿置

每見小兒戲具輒憶之淚泫泫下也御下尤有恩奴隸婢

僕恤其勞苦飢寒非有大故未嘗遽加譴訶其秉心之慈

賦性之篤如此猶憶庚申歲不孝_刑赴長沙值椿萱並茂

王夫人行述

中外融融一堂聚順極人生樂事者曾幾何時而先大夫
見背之後今復遭吾母之變耶大漸之前一日猶起居如
常至晚覺胃膈稍痛次日向晨復手自盥沃沐畧無戚容
日晡竟奄然而逝嗚呼痛哉吾母生于康熙二十五年丙
寅閏四月十五日戌時卒于乾隆九年甲子二月十三日
巳時享年五十有九以乾隆元年先大夫官貴州布政使
覃恩誥封夫人子二長不孝補乾隆丁巳科進士

殿試二甲第二名現任翰林院編修

武英殿行_考加一級以乾隆二年十二月初五日

覃恩授文林郎娶劉氏封孺人四川永寧道諱而位公女次不

孝鄴乾隆戊午科舉人娶李氏原任江南淮安府知府諱

璋公女女五長適內閣中書張諱春慶公子附學生寧禧

次適原任貴州南籠府知府王諱元烈公子候選州同知

垂繹三適原任雲南東川府知府羅諱得彥公子候選州

同知頊齡四適原任太僕寺卿范諱毓韻公子戊午科舉

人候補員外郎清洪五適原任湖廣總督太子少保兵部

尙書孫諱嘉淦公子國學生孝懿孫男五長廷承二品廕

生候補光祿寺署正廷立廷桓俱不孝補出廷正廷工俱

王夫人行述

不孝

鄰

出俱未聘孫女四長字現任貴州布政使司陳

諱

惠榮公孫原任福建霞浦縣知縣

諱

策公子餘幼未字俱

不孝

神

出不孝等苦次督迷語無倫次伏冀

當代大人君子憐其哀衷俯賜採擇錫之琬琰以慰泉壤不

孝感且不朽

孤哀子馮

鄰

泣血稽顙謹述

皇清誥授中憲大夫廣東雷州府知府敏齋馮公繼配

誥封恭人馮母戈氏合葬墓誌銘

恭人姓戈氏直隸景州人故山西朔平府知府諱鳴岐中
女也生有淑德居家孝友惠純父母愛重選壻以嫁歸於
我族祖父雷州公爲繼室雷州公凡五娶其四娶張恭人
遺三男子繼娶恭人時長男年十有四其次以肩相差恭
人入門撫之恩織悉周至衣履親縫紉手爲之繭雖三子
幾忘已之非所出矣雷州公居官仁孝愷悌由家以推之
國恭人來相夫子克當厥心八年而雷州公卒囊無餘貲

居貧食約幾三十年教三子皆底於成子女孫再世婚嫁
及時畢恭人生長華貴既有家命服在躬然執勤如寒素
縫紉烹炮醢醢菹醢率手治精好人無能及者不逮事舅
姑每時祭躬吉蠲爲饗迄老不自暇逸後雷州公二十八
年年六十有八感微疾一夕而卒乾隆四十七年六月二
十九日也乾隆十六年

單恩誥封恭人生男一郿絕聰穎十五歲而殤女二長適工部
主事太谷武潢次適清苑縣生員徐天垣張恭人所遺三
子伯鄧甲午科舉人次邴州學生皆不克終養卒郵娶李

氏生子廷誼廷重郝娶張氏無出其季曰邵國子監生娶
王氏事母極孝將以其年冬十月甲子朔越五日戊辰祔
葬恭人於雷州公之兆以狀示廷工命銘廷工讀其狀哀
情流溢且讀且慟乃謹爲之銘曰

維賢母有行維孝子有文我撮其迹鐫貞珉光昭令德垂

仍雲

從孫廷工拜撰

馮母李孺人家傳

姚江盧文弨撰

孺人李氏忻州靜樂人四川秀山縣知縣代馮君諱鬱之妻也
父暉江南池州府知府孺人生二歲而母閭恭人歿育于繼母
孟恭人長而孝謹嫻禮節知書計年二十一來歸舅中丞公姑
王夫人皆喜以爲有克家婦矣中丞公撫湖南日有痰悶宿疾
發幾殆藥不能進孺人禱於神急剗股投葭湯中以進湯渾渾
異他日詰之曰橘紅耳飲之喉間頓利痰咯出升許病漸瘳越
歲餘乃終姑患瘍孺人晝夜不離側調飲食勤洗滌一不委婢
嫗手洎姑之卒於里中也良人與兄公皆在京師孺人治附

身之事惟謹不留幾微憾秀山君以乾隆三年舉於鄉初知眉
之彭山縣值金川苗逆軍書旁午又奉檄主縣之羅江驛務距
彭山幾四百里所凡彭山所徵發一皆取辦於內主君得無兼
顧憂九再期軍始罷大兵由羅江歸君不得離驛所而楚南北
暨滇黔之歸師皆取道彭山日凡數百一切口糧鹽菜船艦之
費孺人悉綜覈而籍記之及君羅江事竣歸本治臺已下符督
趣報銷軍需甚亟君有憂色孺人出所記厚寸許者凡三冊授
君君乃據以申上於時他官多被劾去至或罹重臯而君獨安
然無恙旋移知酉陽之秀山則皆內助之力也始孺人聞繼母

孟之喪以有老姑在堂未敢遽成服而貌毀瘠甚姑覺之慰喻再三且命之服然後服其初昏從夫之舅任所也舟行溯大江天嚴寒每未明輒起秉燭盥漱正衣端坐君問其故對曰風濤不測脫有虞豈可蓬首耶其明大義類如此

覃恩封孺人乾隆十七年九月二十四日卒於秀山官舍年僅四十子二廷正安徽布政司經歷廷工候補訓導女一適和順拔貢生候補州判劉丹書葬州烟旺村祖塋之旁秀山君後一年亦卒遂啟窆合葬焉

舊史氏曰割股而愈舅疾者前未之聞也乃今於孺人見之著

之史冊豈不照耀千古哉婦人無外事此言其常耳若孺人所處設置外事於不問致供應不以時侵欺不能杜名數之多寡不及詳財粟之斂散無所核要會文簿屢上屢却雖免於乏興之罪亦將坐以放散之愆如是且將重爲子孫累而孺人獨能運其才智以弭患於未形較之登陴禦敵者事不同而情則同也洵乎巾幗中所罕覩者矣

皇清敕封孺人馮室李氏墓誌銘

賜進士及第內閣學士兼禮部侍郎加一級年眷弟錢維城頓首撰文

賜進士出身翰林院編修加一級年眷姻弟范清沂頓首書丹
賜進士出身翰林院侍講學士加一級年眷姻弟周玉章頓首

篆蓋

孺人李氏山西靜樂人父暉淮南儀所監掣同知孺人其次女也性孝謹淑慧知書計年二十一歸今四川秀山令馮君鄴馮爲山右著姓世仕宦翁中丞公之撫湖南也遇

李孺人墓誌銘

疾困甚孺人顙神剗股和藥以進病良已姑王夫人嘗患
瘍孺人晝夜侍疾藥餌不假婢媪手洎姑之卒也孺人經
紀內事悉中禮稱賢婦焉馮君始筮仕蜀之彭山令金川
苗逆軍符旁午而馮君復奉委羅江彭山之事一取辦於
內主其後兵罷而歸師之過彭者日數百計口糧鹽菜船
值之費孺人悉較核而籍記之得小冊厚寸許者三及馮
君歸署而授之俾得爲奏銷支給地也其才而有助于外
類若此乾隆十有六年

覃恩封孺人以乾隆十七年九月二十四日卒於秀山官舍春

秋四十長男廷正聘比部郎范君清洪女次廷工女一將
以次年癸酉秋七月望日祔葬于烟望村之

賜塋馮君愴然不忘伉儷之重也述其行事而來請銘于余
銘曰是唯孝德順巽閨典之宗窀穸于此以利後嗣于無
窮

皇清例封宜人馮母王太君行述

嗚呼

不孝廷堅

等罪孽深重致天奪吾母之速搶地呼天

復何所及耶今年春

廷堅

隨父任在仁懷廳諸弟侍母在

永豐州署接來書言母不習水土漸成瘧症急欲歸永豐侍疾不得秋初吾父卸仁懷事又以公務留省不能回任

廷堅

乃兼程返署問母安母喜動顏色疾亦稍差方冀調

攝可望霍然孰意勞積病深藥餌罔效延至十月二十八日中夜謂子婦等曰來日廿九爲觀音大士齋期我將逝矣乃起坐更衣囑後事毋多費持大士寶號不輟及辰刻

王宜人行述

遂至大故嗚呼痛哉不孝

廷堅

年逾弱冠不能修德籲天

以祈吾母壽考誠生不如死第以吾母一生淑德懿行故鄉之人雖已飽聞而來歎未久此邦人士尙未盡知用敢泣血濡墨敷陳一二伏冀

大人先生採擇焉吾母姓王氏世爲江寧府上元縣望族高祖諱宏祚歷官太子太保戶兵刑三部尙書曾祖諱瑜官刑部郎中祖諱世清官廣西柳州府通判父諱上達廩膳生員母端木氏廩膳公嘗隨叔父荊州府同知世遴公任而生吾母生甫離襁褓卽喜識字既能言就父兄索解字義如

夙解逾十齡誦毛詩琅琅無遺誤書法端勁鉞術紡績皆
精妙先外王父母恒以非丈夫子爲憾後世遴公陞常德
府知府寢疾城中有斗壇降乩甚靈驗廩膳公率女同往
禱疾乩仙獨賜詩云湘水清且深巫山望何高春風吹江
籬微波蕩桂舫中有彼美人顏色若瓊瑤高韻奏白雪清
聲揚碧霄英皇共驂乘與子同遊遨衆咸驚異世遴公歿
外王父母遂留寓武昌適吾父喪元配李孺人游學至楚
聞廩膳公在武昌爲先王母同母弟因敬謁敘戚誼拜見
舅父母及中表兄弟姊妹遂訂吾母爲繼室乾隆甲子冬

親迎禮成乙丑偕歸雁門吾母年二十先王母一見色喜
言於衆曰新婦大不凡似胷中有書卷者貌莊氣靜骨重
神寒操持內政馮氏之福吾王門亦與有光焉時先王父
按察公已謝世先王母在堂吾父以廕生例入太學讀書
不獲常侍晨夕先王母年逾六旬常患怔忡不能寐每夜
漏初下吾母侍左右取稗史諷誦爲娛悅徃徃漏盡始還
寢辰刻卽起盥櫛家事無巨細必親自檢點惟懼稍不整
肅遺堂上憂終歲以爲常無幾微厭倦形於顏色又念家
君遠在都門膝下無他子乃時時邀從伯聖從公從伯母

黃相過留復迎太原李氏姑母及姑夫來同居以博先王
母歡辛未李氏姑隨夫之官吾母又迎從祖姑崞縣張氏
及表姊汾陽張氏鳳臺王氏夫婦偕來歡聚蓋兩表姊咸
李氏姑母所出而張氏姑亦先王母自幼撫養尤所鍾愛
也吾母來歸之次年生先姊後久不孕乃請命先王母爲
吾父置側室于氏卽不孝等生母戊寅廷堅生巳卯廷望
生辛巳廷圭生先王母素以吾父孤子爲憂至是連舉三
男因以大慰壬午家君例選奉天府經歷慮道遠難於迎
養遂援例捐知縣分發河南先王母不樂就養命婦隨行

吾母因長跪請曰姑高年子爲祿仕違膝下媳又隨夫任
母恩愈高厚子媳無以自安若慮夫子起居無人妾及幼
孫可相隨媳願及長孫留侍左右先王母憐而許之家君
赴豫後生產更微每歲寄薄俸又緩急難應期吾母則損
糗奩以進甘毳不使稍有所缺周旋親族酬應婚弔無愆
禮先王母從弟石臣公遊幕保定姑夫李公宦工曹皆貧
甚吾母並時相資助用慰高堂隱念癸未先姊年十九已
許字西寧李氏出閣有期忽感疾不起吾母仰天嘆曰只
此弱息猶早殤命乎何尤隱忍不敢自傷以重高堂之戚

乙酉家君補闕鄉縣丙戌

廷翌

生吾母致書家君曰今幸

得丈夫子四人一雖襁褓三已長成家傳詩禮讀書爲重

廷堅

在家課讀不敢少懈餘子隨任中州名師更易得萬

勿令其失時因嚴諭

廷圭

等詞更懇切今

不孝

等長逾弱

冠幼亦成童而學業皆未成就清夜自思惟有哀號泣血而已庚寅先王母九十大慶家君欲歸不得因致書中外年家製錦爲壽舉凡高堂慶祝禮儀以及四方賓從贈答吾母從容布置條理秩然時先王母春秋高凡子姓遠近稱觴者衆禮節旣繁飲食難節遂患腹疾精力頓衰吾母

躬進參芪晝夜不解衣扶掖擁抱不少離至夜則稽顙北
斗籲請而疾不瘳八月初十日辭世吾母痛不欲生一切

衣衾棺斂附身之具必誠必信無少遺憾外事請從伯聖

從公率

廷堅

主持內事以一身摒擋及家君奔喪旋里相

夫守制悉遵古訓嗚呼吾母之事先王母二十五年如一

日養生送死皆克盡禮古稱賢孝何以加焉癸巳夏家君

服闋入都赴補黔省令不孝

廷堅廷望

隨任吾母偕生母

及

廷圭廷翌

里居奉春秋祭掃乙未家君補甕安縣議接

吾母來黔吾母致書曰黔路七千里資斧不易辦且四男

皆已長成向平之願亦不可不早為謀也因止不往次第
與四子皆聯姻世族而家居益刻苦又長齋禮佛為家君
祈福朝夕百拜寒暑無間也丁酉家君陞永豐州知州戊
戌遵例引

見順道遣 廷堅廷望 旋里吾母相見喜甚秋八月 廷堅 完婚田

氏九月 廷望 完婚霍氏一切簪珥衣服皆吾母篋中所藏

不增置一物而禮儀畢具嗚呼吾母為 不孝 等苦心亦可

謂至矣冬十月家君回黔赴永豐任己亥夏五月 廷堅 等

奉吾母暨生母偕眷屬悉至署家君遠宦天末七年於茲

至是始得一家歡聚極天倫之樂於是吾母秉內政相助
爲理家君益得夙夜在公無內顧憂庚子八月恭逢

皇上七旬萬壽

恩賜內外大小臣工誥命吾父旣請贈庶祖母蘭宜人又應
封本身妻室因謂吾母曰薄宦無以酬令德惟此差用相
慰耳母曰夫貴妻榮固所大願獨念從兄聖從公夫婦長
侍翁姑膝下又主翁姑喪事與夫子恩義如同胞明年六
十初度何不詳請馳封爲長者壽吾父躍然曰明禮能讓
可謂賢矣遂請馳封聖從公夫婦嗚呼吾母輔助家君內

外公私無不中情中禮方冀享遐齡臻上壽爲吾父分憂
爲子孫集福何意未及六旬天遽降此慘割耶嗚呼痛哉
吾母生于雍正四年九月十二日卯時卒于乾隆四十五
年十月二十九日辰時享年五十有五生女一早卒子四
人 不孝廷堅廷望廷圭廷翌 生母于氏出孫男一宗一 不

孝廷堅 出 不孝廷堅

謹卽能記事以來耳之所聞及目覩

而身受者畧次梗概惟期徵之有實不計哀而無文伏冀
當代大人君子錫之銘誄俾吾母淑德嫻行用光女史則 不

孝 等生生世世感且不朽

哀子馮廷

望堅圭

泣血稽顙謹述

皇清例贈安人馮室范安人墓碣銘

有序

賜進士出身

誥授中憲大夫見官翰林院編修四庫三通兩館纂修官日下
舊聞國子監志兩館總裁官大興朱筠撰

賜進士出身

誥授奉直大夫禮部儀制司主事宛平史積容書

乾隆丁酉夏代州馮君廷正秋山自海外歸喪其嘉耦范
安人哭之逾期而悲知秋山者聞之皆曰若非過情方乙
未春秋山將從其從兄廷丞之官而浮乎臺灣也安人止

范安人墓碣銘

卷二

之曰君落拓且倦游矣何忽浮海爲秋山不聽行已果安人則解所佩順治錢錢面正書原字者謹爲秋山佩之此

錢蓋

國初鑄自太原局者也而里語以順加原文爲吉祥曰佩之不逢不若比海舟發揚帆行抵臺灣差一日耳則颶作於海中舟人沈木猶于海舟與浪簸應艱不得休秋山起顧海中萬怪蠕蠕恍惚出覩則持其兄慟哭悔不聽安人言如是累日颶止達官所作書來告家安人大驚泣亦累日益念秋山之隔在海外也則設觀世音像於臥室朝夕禱

且祝曰願減已命算祈夫康寧歸無他及秋山以五月至
京師而安人四月二十九日之訃至秋山泣且呼曰我佩原
字錢歸而我婦以禱我獨死我之不死于海獲歸我婦之
算所減而祈耶其秋復至

京師泣告余曰廷正無以答吾婦賢惟公賜銘以傳之已而
秋山恩恩以從兄之事南去明年戊戌冬復來泣拜益請
余嘆曰秋山其鍾於情余所宜銘也已按安人介休范氏
父前寧波紹興台州三府兵備道清洪母高氏安人八歲
喪母哭括髮卽次如成人繼母馮卽秋山之姑也秋山少

范安人墓碣銘

孤其姑又爲外姑故長贅於范氏范氏號豪富方爲郎寓
京邸僮婢數千指以上出入侈甚秋山故名家子讀書尙
氣心以依婦家爲恥小不合輒謂婦吾不任居此安人亦
心恥以豪家女視其夫故折節自卑下冀稍稍安夫心然
所事者繼母徒以賢且孝博母歡早夜服御飲食一切實
不獲自由他日繼母所生子患痘症頗殆父母過愛甚卽
睨之不忍避他室中獨安人躬鞠視之忘日夜比痘告瘳
而衣帶一月爲之不解於是繼母及內外皆曰賢凡安人
所以曲折安秋山於其家者百端之一也安人從秋山贅

范氏凡八年而後偕歸於雁門其所處殆恒行所至難者
秋山既歸不解治生產家益落凡九試于鄉自丙子至甲
午輒報罷居鬱鬱安人必預試期爲陳說定數以慰勉之
及罷久久必進曰士讀書初當思發榜發榜後惟有讀書
夫子其母以一第累心矣秋山嘆以爲名言安人以不逮
事先舅先姑每祭必誠必信旣滌終日畢夫弟廷工行最
端敬之如嚴師秋山出家事織悉必咨而後行夫妹七歲
依安人居凡十三年而嫁妹居有小失必涕泣曰妹早無
父母偶有失言之遽嫂所不忍忍而不言嫂獲罪於先舅

姑矣妹勉自愛小姑感之去嫁劉氏稱賢婦安人逮下有
恩命婢康爲秋山妾妾有子視之過已所出其卒也妾哭
之如哭其母安人生雍正甲寅冬十一月五日卒乾隆丁
酉夏四月二十九日年四十有四以秋山官安徽布政使

司經歷例

贈安人子守聘田氏妾所生子定女三人安人出者二妾出者
一謹爲碣于墓而銘之曰

婦矚夫矚厥身夫趨颺而干海若之鬪與舌兮殞妾魄與
魂禱僧伽兮呵夫君毋從夫之命兮以妾命延夫歸來兮

寧有棺棺非木之直直兮化而爲望夫之石兮代土之風
匹颶力兮颶莫撼夫舟之纜土之風則力安人之棺安安
貞不易兮

清故馮室黃孺人墓誌銘

賜進士出身

誥授中憲大夫見官四庫三通兩館纂修官日下舊聞國子監志兩館總纂官翰林院編修大興朱筠撰

代馮生廷工從余游戊戌冬自其家千里來謁請余爲其婦黃誌墓石余聞禮內言不出惻然馮生所述婦行可信也且生之行端有素信於余者矧其言耶按生婦姓黃氏生同省山陰之安祥寺村人父家鳳縣學生母馮生族姑也七歲父卒獨與母居家稱其賢十八而歸於馮乾隆戊

黃孺人墓誌銘

卷二

寅春正月也馮生亦十六而孤二十一而授室婦來廟見
畢稱先舅先姑以事君子馮生宜之稱曰婦事廷工恂恂
如子之事嚴君也其宴居之際也如賓而講習如良友也
自初歸歲冬生女子子病幾殆而復自是病數作止者閱
二十年中間丁亥舉男子子矣七歲而殤則私鬻簪珥爲
生買妾胡已而有身丁酉春免又女子子也婦鬱鬱曰禮
士娶妻及有側室凡爲無後也而今如是越歲卒其年戊
戌春馮生自念以諸生試屢黜去入貲就教職需次太原
夏六月檄署大同府學訓導過家留數日去官所而婦竟

以閏六月二十九日卒於家生聞之悲甚悲其賢也故狀
之具昔人之情與文焉而余更從生問得其敬事夫而有
合於禮與經者謹比例書之按記內則稱婦事舅姑而繼
之曰少事長賤事貴共帥時是妻事夫之文例於此也婦
之事馮生每奉生冠衣非盥手不以奉示遠褻也與記冠
帶垢和灰請漱鄭君云手曰漱孔氏云冠帶既尊故以手
漱之文合婦倉卒授生衣及冠必以幌幣薦之然後授之
此與記文其相授則女受以篚其無篚則坐奠之而後取
之義合又婦視生饌則必躬舉以進而侍於旁生且食且

繙書不喜人以語亂之有自門外來者婦必塞簾詔之令
母入卒食以爲常間有嘉肴生輒擘其半留以予婦婦不
敢食也其食者夫餽俟再食必舉所予復以進俟生舉箸
食則喜而侍食按記敦牟卮匱非餽莫敢用與恒食飲非
餽莫之敢飲食以故婦於生所留遺之半不敢食也又記
旣食恒餽鄭君云每食餽而盡之末有原也孔氏云無所
有餘而再設也以故婦必復以進者所以尊夫朝夕恒食
知其自公良者必夫之餽而末有原也其動合於禮也如是
生旣宜其婦與婦居好以論語說說家事婦則從容間出

辨證徃徃相說以解每歲冬夜月上夫婦披衣起更端或
達旦以爲樂如云君子易事而難說婦曰嫗與婢喜言人
家短長諸姑伯姊或亦喜聽此新婦遇之則謹辭曰若且
去或與難說說近否此邢昺不受妄說之疏也又生語婦
貧與賤不以其道得之不去此大難婦曰富貴貧賤時爲
之若君子卽時而去我失真我矣此何晏時有否泰故君
子履道而反貧賤不可違而去之之注也生又言居上不
寬其何以觀我家某逮下寬而家不治則寬亦病也婦曰
否也譬之爲室者高其閤閼峻其堂廉而人容焉故可觀

如是而寬洵可觀矣若夫毀垣墮牆以爲寬新婦不識荒
祠敗寺觀於何有生曰善嗟呼微斯言曷足以發明至人
寬觀連類之旨哉其達諸經而體諸物也又如是宜乎生
於婦之死而致其悲已婦生歲辛酉秋八月二十一日卒
戊戌夏閏六月二十九日年三十有八銘曰

古曰晉之人饁而敬之古曰洛之神習禮而明詩盡馮生之
婦也合厥美而離不壽也生之腸鐵石生之睚雨以溜魚
生乎曷傷我文其行久且長

乾隆四十四年春二月庚午望從叔邵書丹並篆蓋

皇清例贈孺人馮繼室王氏墓誌

孺人王氏明太保山陰文端公裔女乾隆四十七年冬十
有二月歸余爲繼室凡家政勤慎如老媪母家不貧而糟
糠能厭服余言未嘗面聽背違也來歸期又九月而卒得
年二十有三卒之歲冬十月合前室黃孺人葬於城東北
烟旺村祖阡側室子宥奉祀

馮廷工誌石